

Na temelju člana IV 4.a) Ustava Bosne i Hercegovine, Parlamentarna skupština Bosne i Hercegovine, na sjednici Zastupničkog doma, održanoj \_\_. \_\_. 2006. godine i sjednici Doma naroda, održanoj \_\_. \_\_. 2006. godine, usvojila je

## **ZAKON O IZMJENAMA I DOPUNAMA ZAKONA O POREZU NA DODATU VRIJEDNOST**

### **Član 1.**

U Zakonu o porezu na dodatnu vrijednost (Službeni glasnik BiH br. 9/05), iza člana 27. dodaje se član 27. a) koji glasi:

#### **"Član 27. a)**

Slijedeće se oslobađa od plaćanja (oporezuje nultom stopom) PDV-a:

1. lijekovi i pomoćna lijekovita sredstva, zdravstvena i ortopedska pomagala koji se stavljaju u promet u skladu sa propisima o njihovom stavljanju u promet;
2. proizvodi i usluge koje koriste narodne kuhinje u pružanju svojih usluga;
3. dnevne i nedjeljne novine i službena glasila (izuzev publikacija pornografskog karaktera);
4. usluge štampanja i izdavanja knjiga, brošura, časopisa i publikacija stručnog, naučnog, umjetničkog, kulturnog i obrazovnog karaktera;
5. papir za štampanje i izdavanje publikacija iz tačke 3. i 4.;
6. učila, uključujući i računarsku opremu i softver za predškolsko, osnovno, srednje, više i visoko obrazovanje."

### **Član 2.**

Ovaj Zakon stupa na snagu narednog dana od dana objavljivanja u službenom glasniku BiH.

Parlamentarna skupština BiH

Broj: \_\_/06

Sarajevo, \_\_. \_\_. 2006 godine

Predsjedavajući  
Zastupničkog doma  
Parlamentarne skupštine BiH  
Martin Raguž

Predsjedavajući  
Doma naroda  
Parlamentarne skupštine BiH  
Goran Milojević

## OBRAZLOŽENJE

### I - Ustavni temelj

Ustavni temelj za Zakon o izmjenama i dopunama Zakona porezu na dodatu vrijednost proistječe iz sljedećih odredbi Ustava Bosne i Hercegovine:

- Član III 1. e) određuje koje su odgovornosti Institucija Bosne i Hercegovine u osiguravanju sredstava za financiranje institucija i međunarodnih obaveza Bosne i Hercegovine,
- Član IV 4. a) određuje da je Parlamentarna skupština Bosne i Hercegovine mjerodavna za donošenje zakona koji imaju za cilj izvršenje obaveza predviđenih Ustavom BiH,
- Član VIII 3. regulira da, pored osiguranja prihoda iz budžeta entiteta, Parlamentarna skupština BiH može također odrediti prikupljanje prihoda na druge načine što bi u ovome konkretnom slučaju značilo osiguravanje prihoda kao izravnog izvora budžeta BiH.

### II - Razlozi za donošenje Zakona

U cilju sprječavanja daljeg osiromašenja najugroženijih slojeva građana BiH, uputno je oslobađajuću (nultu) stopu PDV-a primijeniti na lijekove i pomoćna ljekovita sredstva, zdravstvena i ortopedska pomagala, na usluge koje pružaju narodne (humanitarne) kuhinje u svom radu, te na knjige, publikacije i učila za obrazovanje, nauku i kulturu i informisanje kako je navedeno u ovom Prijedlogu.

Predložena rješenja štite socijalno ugroženo stanovništvo u skladu sa standardima EU.

### III - Obrazloženje odredbi Zakona

Član 1. definiše uvođenje novog člana 27. a) koji se odnosi na uvođenje oslobađajuće (nulte) stope PDV-a na proizvode i usluge od šireg društvenog interesa u ovom socijalnom i ekonomskom okruženju, kao što su lijekovi i pomoćna ljekovita sredstva, zdravstvena i ortopedska pomagala koji se stavljaju u promet u skladu sa za to donesenim propisima, potom usluge pružene od strane narodnih, odnosno humanitarnih kuhinja i njima srodnih socijalnih organizacija koje pružaju ovaj vid usluga, zatim dnevne i nedjeljne novine i službena glasila (osim publikacija pornografskog sadržaja), usluge štampanja i izdavanja knjiga, brošura, časopisa i publikacija stručnog, naučnog, umjetničkog, kulturnog i obrazovnog karaktera, te papir koji služi za njihovo štampanje, te naposljetku učila za predškolsko, osnovno, srednje, više i visoko obrazovanje, uključujući i informacione i komunikacione tehnologije za ove nivoe obrazovanja.

Član 2. utvrđuje završnom odredbom datum stupanja na snagu i primjene Zakona.

### IV - SREDSTVA POTREBNA ZA PROVEDBU ZAKONA

Za provedbu ovog Zakona nije potrebno izdvajati dodatna novčana sredstva iz Budžeta Institucija Bosne i Hercegovine.